

Utoqqalinersiaqarneq pillugu Inatsisartut inatsisaat nr. 20, 23 november 2015-imeersup allangortinneqarnissaa siunertaralugu Naalakkackersuisut peqquneqarnissaannik Inatsisartut aalajangiiffigisassaattut siunnersuut. Allangortitsinermi utoqqalinersiaqartup apparisaata isertai naapertorlugit utoqqalinersiaqarnissamut naatsorsuunneqartarnera atorunnaarsinneqassaaq.

Inatsisartunut ilaasortaq Mariane Paviasen, Inuit Ataqtigiit

Utoqqalinersiaqarneq pillugu Inatsisartut inatsisaat nr. 20, 23. november 2015-imeersoq kingusinnerusukkullu allannguutit ilanngullugit allangortinneqarnissaannik Naalakkackersuisut peqquneqarnissaat pillugu Inatsisartuni aalajangiiffigisassatut siunnersuut, utoqqalinersiaqarneq apparisap isertitai tunngavigalugit allangortinneqartarunnaarnissaat anguniarlugu.

(Inatsisartunut ilaasortaq Jens NapâtôK', Naleraq)

Akissuteqaat

(Isumaginninnermut, Suliffeqarnermut Nunamullu Namminermut Naalakkersuisoq)

Siullermeerneqarnera

Inatsisartunut ilaasortat Mariane Paviasen, Inuit Ataqtigiit aamma Jens NapâtôK', Naleraq, siunnersuummut attuumassuteqartumut matumunnga Naalakkersuisut qujassuteqarput.

Naalakkersuisut 2023-mi februarimi Naalakkersuisut utoqqaat pillugit periusissiaat saqqummiuppaat. Naalakkersuisut iluarisimaarpaat, siunnersuuteqartut utoqqaat pillugit periusissiami kissaataasoq utoqqalinersiaqarneq pisariinnerusoq orniginarnerusorlu tapersorsorniarmassuk.

Utoqqaat pillugit periusissiami suliniut nr. 4 utoqqalinersialinnut pilersuisussaataaneq atorunnaarsinniarlugu siunnersuutaavoq. Periusissiami takuneqarsinnaavoq, Naalakkersuisut utoqqalinersiaqarneq pillugu inatsit allannguutissaanik saqqummiinarlutik kissaateqartut, taamaalilluni inooqataasup isertitai tunngavigalugit nalimmassaasarneq peerneqarluni. Taamaattumik Naalakkersuisut nuannaarput inerniliisinnaallutik siunnersuut inaarutaasumik saqqummiunneqarpat Naleqqap tapersorsorniarmagu.

Utoqqalinersiaqarneq pillugu inatsimmi pilersuisussaataaneq atorunnaarsinneqarnerata ilaqtariit ilaannut aningaasaqarnikkut tigorianaasaannik amerlanerulersitsissaaq. Atorunnaarsitsinerup peqatigisaanik innuttaasut ilaannut sulinissamut kajumissuseqarnerulersitsissaaq. Sulisoqarnerup annertusineqarnissaa pingaaruteqarpoq, inuiaqatigiinnimi assaat tamarmik atorfissaqartikkatsigit. Erseqqissassalluguli pingaaruteqarpoq, utoqqalinersianik ilanngaassisarnerup atorunnaarsinneqarnerata inuiaqatigiinni naligiingissuseq annertunerulersissammagu, atorunnaarsitsinermi ilaqtariinnut qaffasinnerpaamik akissarsiaqartunut pingaarnertut iluaqutaasussaavoq.

Pilersuisussaataanermik atorunnaarsitsineq utoqqalinersiaqarnermik aaqquissuusaq pisariinnerusup tungaanut alloriarneq siulliuvoq. Naalakkersuisunut pingaaruteqarpoq erseqqissassallugu, utoqqalinersiaqarnermik aaqquissuusaq pisariinnerulersinniarlugu Naalakkersuisut arlalinnik kissaateqarmata. Naalakkersuisut anguniagaraat, utoqqalinersiaqarneq ataatsimut isigalugu paasiuminarnerulersinneqassasoq, aamma

utoqqalinersialinnut nammineq kissaateqartunut suliffeqarnermut ataannarnissaq kajuminnarnerulersinniarlugu.

Tamanna aamma takuneqarsinnaavoq Naalakkersuisut utoqqaat pillugit periusissiaanni suliniut nr. 3-mi ”Utoqqalinersiaqarnermik aaqqissuussaq”. Suliniut tunngavigalugu 2023-p ingerlanerani utoqqalinersiaqarnermik aaqqissuusseqqinneq pillugu oqaloqatigiinnerit aallartinnissaannik Naalakkersuisut kissaateqarput. Attanneqarsinnaasumik aningaasarsiornikkut siuarsaanissamullu Pilersaarummut takkuttussamut ilatillugu utoqqalinersiaqarnermut aaqqissuussaq ataqatigiinnerusoq Naalakkersuisut kissaatigaat. Ukiuni tulliuuttuni 10-15-ini inuiaqatigiit katitigaaneranni allannguutit utoqqaanerusut amerlaneruligaatsiarnissaannut naleqqiullugu utoqqalinersiaqarnermut aaqqissuussaq paasiuminarnerulersinneqassaaq patajaannerulersillugulu.

Pingaaruteqarluinnarpoq utoqqalinersiaqarnermut aaqqissuussap pisariillisarnerata qanoq isikkoqarsinnaanissaa pillugu politikikkut isumaqatiissuteqarfiginissaa. Taamaattumik suliarinerata ingerlaneranut Naalakkersuisut Inatsisartuni partiit ilanngutitinniarpaat.

Naalakkersuisut naliliipput, utoqqalinersiaqarnermut aaqqissuussamik annertunerusumik aaqqissuusseqqinneq politikikkut suliniutaasoq annertoq pingaaruteqartorlu ilisimanngisaniillu amerlasuunik imaqartoq. Taamaattumik utoqqalinersiaqarnermik pillugu iluseq qaqugu naammassineqassanersoq inaarutaasumik ullulernissaa ajornakusoorsinnaavoq. Taamaattumik Naalakkersuisut siunnersuuteqarput, utoqqalinersialinnut pilersuisussaataitanermik atorunnaarsitsinissaq alloriarneq siullertut suliarineqassasoq.

Tamanna tunngavigalugu Naalakkersuisut allannguutissatut siunnersuummik saqqummiiniarput: Utoqqalinersiaqarnermik pillugu inatsisip allannguutissatut siunnersuummik Naalakkersuisut saqqummiussinissaannik peqquneqassasut, taamaalilluni inooqataasup isertitai tunngavigalugit nalimmassaasarneq atorunnaarsillugu. Siunnersuut kingusinnerpaamik UPA2024-mut saqqummiunneqassaaq.

Naalakkersuisut sinnerlugit oqallilluarnissassinnik kissaappassi.